

萬曆武功錄

萬曆武功錄卷之十二

翰林院添註待詔瞿九思著

東三邊

速把亥列傳

速把亥。虎喇哈赤仲子也。嘉靖丙午歲。以三衛故遷徙舊遼陽迤北沙塌之間。於是部泰寧人抄木。花大。把兒都。紅臉孛羅等。引弓之夷萬餘人。頗虓勇。東西到錦義一千五百里。所在皆可直入。犯無險阻。是時大父魁猛。磕惑內羅言。常入我刺梨山殺邊吏王相。甚至鹵略人。動以三四千數。自是之後。花當之屬皆

與虎喇哈赤並勃勃著名塞上矣。延引至速把亥世。益慄悍。出入乘羃。張旂志鼓吹。吹掌威篋。數數然從土蠻入海。蓋開原已。謀欲自白。土厥入廣寧。又欲自遼河兩岸入瀋陽。奉集堡當是之時。泰寧人果力簡亦叛。新亡抵速把亥。力簡居遼陽久。自弘治時。曾大父恩。孛羅那孫恩。克魁勒孫等。一十三族來歸降。至力簡。凡四世矣。頗知塞上精兵處。速把亥心愛之用。爲鄉導。果克舊市堡。殺我總戎殷尚質。遊擊閻懋官。把總魯仲仁。及軍民四千餘人。先是降夷黃勇。偕范達子。亦提桴鼓從殷總戎與俱。旣行至塔兒山。軍陷。

兩人遂降速把亥。胡中亡所知名。居月餘。兩人復亡入塞。邊吏問若亡何也。兩人皆言非亡也。不幸爲虜所執。今乘間得亡。亡虜也。邊吏以故益不疑。頃立兩人長蒼頭軍。稟食邊吏。邊吏優遇。往往在諸軍右。久之。總戎修登新視事。遇兩人稍衰薄。於是勇有後言。以爲吾安能鬱鬱久居人下乎。先是勇與黃台吉女額卜寨額卜指通。畏誅。歎雲中上谷塞得傳送遼陽。勇度是時速把亥昆弟強盛。吾姑依此輩起。卽黃台吉有如一日。欲問我彼安能越速把亥昆弟而柰我何乎。於是與大哈刺等七人詣抄花營。又不可去去。

速把亥勇自知前已降亡。今又復降。彼必疑我。乃自謂我必先以塞上兵馬及地形爲彼陳說。什一二。夫然後彼知我無復有他腸。此必深信我無疑。不然者。我請以數萬騎橫行漢塞可乎。頃見速把亥果如所語。壹語連日夜不倦。速把亥大悅。悔相知晚。於是易勇名曰失兒克。而以夷婦孛兒亥室之。因賜之牛馬各四十蹄。橐駝二頭。羊六十。角與謀漢勇謝曰。吾幸假此報君於塞上。如何。是時嘉靖四十四年七月也。其九月。卽引速把亥八千餘騎。從鎮安堡略廣寧城。東至青雲臺。會邊吏惡勇亡。捕繫勇家室就京。勇至。

問家室安在。蒼頭軍小滿兒具如實告。勇低徊者久之。卽略人畜馳出塞。曰。豈以爲我終不能修報乎。其十月。從義州大清堡入。王漢屯行間。逢佟將軍。益用宿怨。故挑戰殺我官兵吳鸞等七十餘人。傷二百餘人。其十一月。引九千餘騎從平虜堡入。瀋陽。其十二月。引一萬餘騎從遼陽入。長勝堡。其明年正月。復入長勝堡。其四月。引八千餘騎中分軍。以一軍捕伏鎮武堡。以一軍擊邢百戶等臺一十一座。殺我軍四十餘人。已復與委中從鎮武西平堡入。廣寧東南。已復以一萬騎入。牆嶺。誘我軍。於是備禦苟麒追逐伏虜。

倉卒起殊疾力殺苟麒等二百五十餘人奪驛騎馬四百餘匹於是大言阿黃勇旦日下沙嶺傳家庄揚揚馳塞上以示非復前日轅下勇也而速把亥由此益壯之乃與勇馬五十騎牛一百蹄羊二百角得進而視兵馬事矣其九月引四十餘騎入錦州大勝堡其十月從大勝堡入凌河其十一月從高台堡入沙河其明年正月引二千餘騎從長靜堡入鞍山其三
月引一千餘騎從長定堡入打鶯基備禦王承德死之是歲隆慶元年也其正月入長鳴墩我兵追逐至勾家寨斬首一級奪獲馬九頭其二月入芍藥溝追

亡斬首一級。馬二頭。後從瓦子谷入裨將王世祿。鏖戰斬首二級。後從松樹口走小孤山。祿逐北斬首二級。其後三月。從柞子溝走崔勝谷。我兵斬首一級。後從石門。臺追逐至白塔谷。斬首一級。其四月。朵顏夷卜萬等千餘人。傳箭請入市。於是臺御史魏學曾御史李叔和。使遊擊郭承恩詣關市下。撫賞而速把亥諸部阿某赤等。亦多闕匿於其間。爲通事陳紹先覺。微告承恩。承恩乃使使者捕之。得三百七十六人。項驗問一百一十六人。又五六營夷也。趨賞之。去它一切繫獄。必欲獻見黃舅。而後得解免。於是速把亥見

質夷過多。恐有不可諱。漢一日盡置之於理。縱是屬不言。卽異時余悔將何及乎。廼以二十六日。鄕當勇詣塞。伏漢法。承恩始釋阿某赤等。撫賞如初。於是上賜制置使劉燾以下金幣有差。其五月。從馬鞍山直走渾河。漢出兵挑戰。斬首四級。奪獲馬一十五騎。我千把總王世忠、孫衍慶中流矢死之。軍士死四十四人。傷九十二人。馬八十二匹。其六月。入鎮靖堡。守備使陳言及千夫長趙宋周之望追逐至東長嶺。過延佛寺去邊可二十餘里。多所斬獲。虜亦殺官軍六十三人。馬七十六騎。其七月。速把亥以爲自吾得

勇而所戰必克。殊深悔前日逼我縛勇者。郭將軍也。乃益阻鎮靖堡外邊。冀欲泄逼勇之忿。先是大哈刺等七人未獻。尚質速把亥所知交夷十七人而速把亥亦虜我臺軍相當其八月。從古城臺入鎖龍果谷追逐。斬首三級。後從大杵子谷追逐。斬首二級。後從白山衝追逐。斬首四級。後從一堵牆直擣鰲場堡。張能谷而裨將劉雲行捕至孤山堡。虎廷谷斬首四級。旦日復䟽廟家谷。斬首三十級。虜亦射我軍朱天洗等三人。傷孟友等九人。明日復從新臺入光石板溝。我軍斬首一級。餘虜皆走。小駙馬營出邊止舍臥牛。

山是後廼偕黑孛羅聚黨九千人壁鎮靜堡間遣輕騎數百誘漢兵漢兵亦捕伏聽諸虜諸虜然後稍稍退頃請曰將軍第還我質夷五人我即以臺軍還於是與之九人居八九日又與四人所不遣者厯三人矣速把亥竟諉鎮遠臺通事李世勲王海及臺軍一人而去是時虜中多漢人幸爲我邊吏言此中計欲大舉遲質夷還歸舉矣其九月速把亥黑孛羅復欲入廣寧以車營燒火精候明黑孛羅乃躬馳鎮靜堡裨將杜鏜所叩頭請市賞已索質夷因與之二人其一人繫必李世勲至卽遣不女欺其十月從古城新

基入我兵追逐至五岔湖斬首二級其十一月從長溝遂北斬首二級奪獲馬二十九騎其十二月從東山奔小佃子屯追亡逐北至古河斬首五級其明年三月虜騎五六千捕伏廣平山廼先使五百餘騎馳平虜臺拆牆墊壕漢兵追逐至紀家臺斬首二級奪獲馬四騎已至張堡山斬首二級我兵輕重傷陳文舉等五十二人其四月復西引炒蠻把都兒東引委正把兒得大率四五萬聚捨刺塔刺少者四三百騎多者五六百騎或捕伏鎮靜堡鎮安堡倏忽自雲山羊山亡常處其五月從鎮安堡古城入我兵以爲大

舉。麋戰。廼八九十騎也。望見我兵至。盡反踵走。走山塞。頃復以千餘騎從鎮夷堡韓口臺入。捕伏紅巖子溝。先以十餘騎直走瓦子谷。是時遊擊將軍郭成恩道逢虜疾力。斬捕甚多。其六月。速把亥黑李羅使六十騎盜邊。頃復以三百騎從分水嶺入。還過北安屯。青石厰。然虜衆漸合至萬餘矣。爾我男婦一十二口。牛驢七十六頭。我兵亦斬首一級。奪獲馬二匹。其八月。速把亥復引十言兀欲犯廣寧錦義之間。廼以九百騎從錦州大福堡入。於是以四百騎。疆刈我田禾。以五百騎走塞。頃之復合營。直走錦州。乘山舉火。

我兵追逐至羅巴子嶺。及一片石臺西女兒山。斬首
七級。奪獲馬二十八頭。其九月。六七千騎走鹹場。揮
汗成雨。將軍李成梁度虜必從大康南走鍾家堡。乃
止壁。於是分布諸將軍軍袁家屯。紀家屯。高家屯。王
謙屯。何智屯。小方家。大方家。戚家。八塔兒。諸堡。頃虜
果以二萬餘騎從大康堡。祝青營。三山臺。卸花臺。入
邊。復還。是時卜言反。欲報錦州之敗。廼引黃台吉。把
兔兒。抄戶兒。都刺兒。那木大。阿信等。二三萬騎。聚義
州凌河。欲大舉。會市夷覺。微以狀告塞上。兵威甚設。
皆遁走。其明年正月。速把亥。反青。大會鵬背山。遲炒

花諸騎決志欲從丁字泊。十方寺入。我兵疾力復還。歸頃以五百餘騎走北腰舖。我兵馳赴懿路城。鏖戰破之。斬首一十一級。奪獲馬六十一頭。餘虜皆壁黃甸子。我兵直擣其壁。斬首捕虜七十六級。奪獲馬牛羊六百頭。器械亡算。其明年十一月。速把亥委正抄花合兵羊腸河。詳言擊土蠻。陰欲略河東遼陽。於是副總戎趙完以一軍軍遼陽。叅將郭成恩以一軍軍虎皮驛。備禦安整以一軍軍奉集堡。裴承祖以一軍軍鮑家屯。柯萬以一軍軍平虜堡。齊可以以一軍軍一堵墻。亡何虜騎從賣酒望墩入。我軍並擊大破之。斬

酋首把兒太甯公提等首。大率五百八十八級。其八月。臺御史張學顏。微令土蠻捕速把亥。歹青。不惜萬金重賞。其明年又二月。速把亥。歹青。旁河以爲壘。當是時。酋首佟鎖羅可赤。沈尅你對替等。亦聚兵散羊谷。清河。欲入邊。於是速把亥。躬帥數百餘騎。從長勝堡。棘榆塢入。漢使大將軍出蓮花塢。得胡首虜四十四級。餘黨悉渡河奔逃。我兵亦傷十八人。居八九日。胡騎六百。從靖安口入。漢兵追逐至柳河屯。亡所得。而會塔兒山鳴柳。聲徹四野。復迨至將軍廟。已至板塲谷。斬佟鎖羅可赤等首一百五十一級。馬一百二

十六騎。虜亦殺我軍三人馬三十五騎。軍重輕傷一百餘人。自是之後。虜亦殺略我塞下亡已時。於是使禽首忙子把其三等。告急於王台。台保塞忠虜也。廼執把其三等劍斬之。其明年春。大將軍李成梁見爲速把亥被敗長勝堡。近漸徙廣寧以北。虜騎羸弱。勢頗可乘。乃微使蒼頭軍孟達子。劉達子等。出鎮安堡。訶虜。我兵出不意。出塞以奪虜氣。而以叅將黑雲龍軍居中。備禦戴冠攻其右。武舉凌雲攻其左。遊擊傅廷勲中軍。蘇承勲掌戰車。其正月出鎮夷堡八十里。至皂洞山。其二月出鎮邊堡六十里。至亂石山。亡所。

得得雜木數萬。其三月出白雲山一百二十余里。至金線塔。會虜騎三百。跳驅走平山。山林深箐。望見漢兵。輒棄馬。捧頭鼠竄入林中。殆如蜚。於是軍中傳令戰車。捨手。發火器。烟火相望。斬首六級。奪獲馬二百餘騎。我蒼頭軍于國。李艾等。亦傷二人。馬一十四騎。是歲隆慶壬申也。其明年癸酉三月。速把亥炒花從山林中。微使零騎訶漢兵。復欲結黨察罕兒。犯我鐵嶺。瀋陽已帥八千餘騎。伏頭林子。先是回鄉人元陞。以其狀告。於是副總戎楊騰。遊擊張延賞。馳曾遲堡。叅將王永祐。遊擊曹簋。馳平定堡。叅將郭夢徵。備禦

國賦楊謙柯萬郭衛民宿振武馳鎮西堡大將軍
李成梁馳彭家灣並傳發虜畏漢兵威復還逃我兵
勇氣益百倍追亡逐北至鵬背山忽大風從東北起
雨雪蔽面賊乃棄旂鼓復犇入山我兵斬首捕虜凡
五十七級奪獲馬二百七頭器械亡算是時西虜黃
台吉大會土蠻入遼陽備兵使王之弼兵巡使賀濤
乃告叅將馬文龍郭成恩微使降夷哈卜寨等誦虜
而李成梁亦使李平胡從義州大清堡出塞二百五
十里斬首一級奪獲馬一百騎其四月從小夾臺入
漢兵追至廟兒山斬首二級奪獲馬二騎已復以一

百五十騎入散羊谷。遊擊曹簋追亡。斬首三級。俘獲馬三騎。其五月。胡騎四百從喜鵲窩入。叅將郭夢徵鷹擊。斬首一級。奪獲馬三騎。已復以四五十騎入犯榆羔臺。追逐。斬首一級。奪獲馬二騎。其六月。以四十餘騎入雙樹臺。漢兵逐擊。斬首一級。奪獲馬九頭。其七月。復犯孤山墩。我兵馳三道河。鏖戰。斬首一十一級。其八月。復欲引上言兀。堵刺兒。擒勞亥。入廣寧。大小黑山。錦義。以湍雪前羞。乃爲朶顏人伯戶卜墩覺來告。先是速把亥。結連董忽力三百餘騎。過灤河。聲欲犯羅文馬蘭之間。是時合虜五枝。財可得三百騎。

而給諫張書奏以爲虜輒大言入漢塞。至易漢也。語
在奏疏。其十月以三十餘騎圍新水衝臺。守備馮文
翰逐擊。斬首二級。頃虜騎百餘馳青山。漢兵寡弗敵。
奪獲胡馬一十七騎。頃以五千騎從汝花一臺入。我
兵追逐。斬首一級。其十一月堵刺兒。卜言兀則已合
速把亥。漸增至二萬餘矣。於是堵刺兒計欲入錦義。
而卜言兀則又欲并略開原遼陽。廼詳言凡吾所欲
略。略建州諸夷也。是時灰正亦欲以七千餘騎入廣
寧塞。而堵刺兒復馳散刺會土蠻打刺罕。大率三萬
餘騎。用此欲橫行遼陽金蓋間。李平湖卽從鎮寧堡

出塞至中漵河一百二十餘里。見虜兵皆精勇而還。虜乃以八千騎從汝花一臺攻八里莊堡。我兵逐北斬首一級。奪獲馬三騎。橐駝三頭。李成梁乃下令。令爲左右陣。類一二字。已廼誠曰。敢議令及不如令者。斬。遂決策以十七日子時出兵。虜亦先使所親愛廉得其狀。乃披甲兵吹盛樂鼓行而前。我乃左右轉鬪。而中將軍李成梁接戰。會平明。火器擊傷頗多。斬上列赤等首三十三級。奪獲馬五十三騎。橐駝四頭。是日天大寒。雨雪。卒之墮指者十二三。弗可深入。廼還塞。已虜騎從長山臺入追亡。斬首一級。漢復使蒼頭

軍李得全。訶虜至亮子河。道逢虜騎五十餘。殊死戰。斬首一級。奪獲馬七十三頭。虜遂伏羊房屯。久之。論家丁李平湖。李得全。哨探功。陞授百戶。其明年正月。謀復犯遼陽。是時速把亥與土蠻。益睥睨薊遼。亡厭時。西自虹螺。歷廣平。直抵遼河。延袤五百餘里。胡騎十餘萬。東可入遼。潘開原。西可入廣寧。鎮武南。可入金復海。蓋於是給諫蔡汝賢。奏武備當嚴。頗深遠。其三月。速把亥抄花。委正度塞。下農事急。乃縱虜騎數千。誘漢兵輟耕。頃。漢兵出塞。於是虜中分。以其半東。窺遼瀋。以其半西。襲錦義。亡何。虜騎五六千。急韓平。

虜臺。裨將趙禮昌擊破之。斬首二級。奪獲馬五騎。復
追逐至張保山。伏虜並發。我軍以火器火箭疾衝鋒。
斬級甚多。餘黨皆棄旂鼓走。重輕傷陳文舉等五十
三人。其六月速把亥委正抄花歹青。撻勞漢馳土蠻
營。議以秋高入錦義廣寧。河凍入金復海。蓋遼瀋於
是朶顏人打不哈。具得其狀以告。其九月速把亥戒
諸酋毋盜邊。竅大舉而後可愉快。是時土蠻猶號稱
庸弱乎。給諫李戴度勢必合黨於西虜。乃以書請
留意武備。其十月入開原。忽轉折而入於河西。其十
一月比犯錦州。復人大勝堡。漢兵追亡至黃佃子。斬

首二十六級。奪獲馬九十二頭。已復引以見鄧等。欲入大小黑山。開原鐵嶺。瀋陽之間。頃之。虜騎二萬馳平虜堡。遂至東楊伴溝諸屯。當是時。翟繡裳爲分守使。帥裨將追逐。四面並發。把總白承勳至。王見屯。斬首二級。奪獲馬一十一頭。把總秦得倚至。王大人屯。斬首三級。奪獲馬八頭。壯士李時英至。毛升屯。獲生口一人。馬一頭。遊擊丁倣至。任政屯。斬首一級。奪獲馬七頭。索駝二頭。千總王盛宗至。郭家屯。於是虜半走。半伏壕中。以拒漢兵。漢兵傷一十七人。馬一十九頭。其間十二月。大會上言。台周等六萬餘騎。於插漢。

腦兒。其明年正月。我兵鏖戰長勇堡。斬首一十二級。奪獲馬三十五頭。其三月。虜騎三萬欲犯遼瀋海蓋。或欲犯廣寧關。頃之。虜皆執鈎杆。從平虜堡南靜九臺入。是時總戎李成梁備瀋陽。副總戎曹簠及遊擊張志遜。蘇國賦。楊謙。追逐至國公寨。斬首捕虜一十一級。奪獲馬四十八頭。餘黨棄輜重走。漢兵行捕至河溝。河深十餘丈。虜騎盡傾跌。填陷河水。衝壓死者不下五六千。克塞十餘里。李成梁乘勝提兵悉渡河。射傷二千餘人。會莫。厯取首級一百九十六級。先後大率斬首捕虜二百七級。虜獲馬二百四十七頭。驢

一百九十頭橐駝二百二十頭器械萬餘。奪被鹵男婦三百六十七人。我兵亡丁喻春等二百六十二人。傷丁高宗等三百四十五人。於是御史劉臺奏聞。

上乃詔曰。御史例不報捷。只宜查覈功次虛實。或地方有應處事宜。不妨事後論建。今該鎮獲功已及半月。督撫並未奏報。巡按乃以捷聞。俱非事體。下大司馬問狀。久之。速把亥詳爲款塞。因擁衆深入。督撫梁夢龍使遊擊陶承誥追逐至邊外。斬首四百七十一級。奪獲馬牛羊器械亡算。於是大司馬譚綸請咨。大宗伯行保章擇日祭告郊廟。大鴻臚於皇

極門導引使者宣捷。上乃詔曰。朕恭上兩宮徽號。禮成。該鎮再奏奇捷。此實天地祖宗朕心欽感。照例宣捷。仍遣官祭告郊廟。以答洪庥。於是加李成梁太子太保。廕一子錦衣正千戶。世襲。楊兆張學顏皆加勲。廕一子太學。他皆賜金錢幣帛有差。其四月帥伯言大等四千餘騎。詳言略海西。陰欲犯開原。頃之花大欲犯錦義。復引莽惠伯戶。又聲欲犯寧前。廼先以三十餘騎從大康堡入漢使遊擊孔東儒備禦胡鸞追逐。斬首一級。奪獲馬二騎。其五月虜騎一千有五百。伏鎮西堡城北。事覺。伏起。皆貫弓執矢。

射我軍。我軍中流矢死者二人。趨奔馳出邊。其六月。復入我軍。捕伏鎮靜塞。出不意。斬首十級。奪獲馬二十頭。其七月。速把亥使卜言台周乞兵專難。於是以二百騎從黑莊窠孤松山入。裨將劉登行捕。斬首三級。奪獲馬三頭。其八月。抄花使夷使迭所略通事竇聰到關。頃之。速把亥椎牛祭旂纛。以爲神。其祐余。余姑遲坤肚兒哈。黑石炭卜言台周。委正黃台吉。以兒鄧長兔。煖兔。扯勞亥。彼且至。而吾亦欲入河東開原。濟陽遼陽矣。頃之。伯朱戶結連專難。以兒鄧欲略寧前。錦義。廣寧。而黑石炭亦聚兵養善木。遲速把亥迺

先使虜視河。河水淺則直走遼陽。瀋陽開原不則還走廣寧錦義。當是時。長昂土蠻亦大會諸虜哈麻丹林欲入塞。而朵顏酋長莽惠使夷使送所鹵通事陸偉到邊。具知其狀。於是制置使楊兆都御史張學顏及給諫裴應章皆後先奏。聞其明年正月虜縱三十餘騎馳墓山營。略軍人陳麻子及道上行人。漢使裨將馬文龍追逐至雙營城。斬首五級。奪獲陳麻子等五人。馬五騎。虜亦射我軍馬得功等九人。馬七騎。頃之。備禦王守道從長勇堡馬門出邊。行捕至爛蒲河六十餘里。逢虜騎三四十。挑戰。傷我軍曹奎等七

人馬一騎。我軍亦斬首五級。奪獲馬四騎。其二月。副
總戎曹箴及分巡使蔡可教。使使者王俊從長寧堡
出邊行。至夾灘五六里。虜以二十餘騎襲我。漢復使
遊擊蘇國賦備禦馬衛都。馳袋兒灣。因至菱角泊。擊
破之。斬首一級。奪獲馬牛二頭。餘黨悉遂逃。追亡至
高麗窩。斬首三級。奪獲馬牛七頭。已至死河淺。轉戰。
斬首二級。奪獲馬牛九頭。我軍亦傷杜永功等九人。
馬五騎。其九月。速把亥引哈屯。韋正。及青等二萬餘
騎屯遼河。欲入開原。瀋陽會邊備嚴。遂殺略王台畜
產。焚燒數寨而去。是時。朵顏會長專難。董狐狸。兀魯

伯戶亦入寧錦。於是臺御史張學顏總戎李成梁上書。大略慮遼河爲適中之路。有如一。日東犯開瀋。則有肘腋之虞。南入廣寧。則爲腹心之災。西略義錦。則阻咽喉之路。居頃之。煖兔董狐狸入義州。大定堡漢使裨將馬文龍追逐。斬首三級。奪獲馬二十二頭。其十月。速把亥土蠻聚精兵三萬。皆東行。於是副總戎曹簞急使裨將姚大節。徐維忠。徐永昌。凌雲。分屯瀋陽。頃之。虜騎從黑林墩入。直走靖安。清水河。略王台。由廣順關故道還歸。縱火焚燒道上。芻芻畜產而去。已。復以二千餘騎入開原。威遠堡。小河口。臺。台廼

使兀堵岡告急於漢軍。卽帥備禦唐朴廕戰破之。斬首三十餘級。餘黨悉出邊。是時臺御史張學顏總戎李成梁傳檄土蠻。腦毛大速把亥。然虜騎皆大言。吾欲略廣寧錦義。然後已。於是裨將馬文龍備凌河堡。劉翊元備馬家屯。虜竟從墓山臺走。走井土臺。我兵追至蔡家臺。多所斬獲。其十一月。虜騎二萬餘從寬邦。直擣戴家嶺。黃伯河黑土臺分三枝。一枝奔沙河驛。一枝奔雙墩舖。一枝奔中後所。遊擊王國瑞追逐至沙河驛。營盤山斬首一級。奪獲馬一騎。王大璋馳石河舖。奪獲馬二騎。虜亦傷我軍七人。殺王奉等四

人馬五騎。頃合戰中後所西亂岡。臺殺我蒼頭軍葉國用。徐文。徐世忠等一十一人亡。何復從新興營。蕭子溝走東關驛。塔兒嶺深至曲尺河。舖漢大出兵。轉戰斬首二級。奪獲馬四騎。自是之後。速把亥引莽骨大莽骨能哈不慎。萬餘騎聲欲略遼陽。於是臺御史張學顏慮中後所地勢平漫。而沙河驛東關驛又嘉靖中已陷之城。欲加兵防守。其明年正月。虜益旁近邊塞。其二月入海州東勝堡。已入前屯瑞星堡。止壁舊遼陽。大將軍李成梁度虜此必誘兵。以爲我兵必西防。彼迺東馳。乘我所不虞。必無疑。於是發遊擊裴

永勳馳寧前而以秦得倚。協守遼瀋。是時備禦楊四德使使者于現等七人。巡檄雕背山道。逢五十餘騎。殺戮殆盡。頃虜騎二百。從鎮西堡靖虜墩入。射死蒼頭軍三人。馬二騎。已復入寧遠。殺官兵一十七人。其三川虜縱二十餘騎入宋家泊。略牛六頭。軍一人而去。頃復以三百騎捕伏鎮西堡。賴武備嚴。馳還。於是大將軍李成梁決策襲大營。廼以李成材。李如松。李如栢爲一軍。王維貞。劉登泰。禿萬春。郎梅。蕭汝芝爲一軍。而成梁及曹簠。楊燮。王永祐。蔣國泰。戴良棟。常春。馮文翔。楊四德。霍九臯爲一軍。皆屬傅廷勳。姚天

與徐維忠徐永昌掌之期十五夜出邊行至中遼河
北羅兔一百餘里天明去虜營漸近軍中砲鳴如雷
虜衆僉卒見漢兵如自天而下大驚自相蹂踐死者
及赴河溺死亡莫斬阿都奈把吉等首凡五十二級
我兵亦傷丁朱沛等三十八人馬二十一騎是時成
梁見爲地澤樹稠於深入不便趨罷兵成梁殿後行
緩頃之夜不收劉友升以二十人從代子河北團灣
兒出邊四十餘里因捕伏爛蒲河鏖戰斬首二級奪
獲馬一騎虜亦殺我軍一人馬一騎相當其四月速
把亥偕土蠻打來罕黑石炭歹青拱兔煖兔以兒鄧

欲請比宣大貢市。往廣寧欸塞。以爲歲遺。我繒絮米
藥則已。不遺我而廼云謝絕。則我以數萬騎馳蹂廼
稼穡也。於是李成梁躬帥親兵李如松。李永才出邊。
旣行至西寧堡。而御史趙允升方行部宿堡中。聞虜
倣卽臨兵。趨李成梁親兵李成材。李如松。如栢。如桂。
如梧。疾力戰。而虜騎則已分爲三枝。一枝馳內邊。一
枝馳路壕。皆張旂志。鳴砲。勢頗盛。於是如松尾虜騎。
還入塞。挑戰。斬苦力得等首五級。奪獲馬三十四頭。
漢兵亦多敗北。會裨將李澄清。陳朝升救兵至。虜始
犇舊路。從珠子河出邊。頃之虜騎二千從公山堡。麻

溝臺直擣連山驛成梁亟馳雙樹鋪虜騎方壁灰山
接火臺舉火益逼近連山驛於是遊擊孔東儒亦馳
皂隸山虜見漢兵疾力皆遂走我兵斬首一級奪獲
馬一騎是後太僕張世胤備兵使李松使使者微行
詢青山口義院口土蠻方牽馬至哈刺毋林老河欲
疆廣寧開市如故已度不可得遣長兔長昂西犯寧
前遣東喉歹青哈屯速把亥犯瀋陽鐵嶺先是御史
趙允升劾奏虜數入興水小團山白塔谷仙靈寺已
復東入連山西入寧遠南入海圻殺略人畜亡算
上有詔言西寧堡之捷撫按奏報不同御史親與賊

過其言必實下大司馬問狀其五月兩入錦州廣寧
索貢市不從其九月復使莽惠馳鎮靜堡語在土蠻
傳其十一月復使速把亥入海州旦日卽出遼略大
康堡軍夜于朝其十月略大興堡軍張仲禮等四人
已略大福堡軍韓用已略胡孜等八人已入中前所
略大福堡軍李祿已略大定堡軍王得功已又使長
昂入前屯已略大定堡軍李思功已略開原軍李進
羔等七人民蕭志學等十一人其明年正月與黑石
炭反青炒花等復聚捨刺母林語在王台傳頃之速
把亥縱部曲犯開原遼瀋廣寧諸邊而土蠻亦移師

遼河劈山劈山乃在開原遼陽間也於是李成梁以
十七馳濟陽旦日至丁字泊虜乃以數百騎繞牆而
入成梁躬率車騎追逐直擣劈山去邊已二百餘里
漢出火器弓矢挑戰擊破之斬阿丑哈等首凡四百
三十五級奪獲馬四百七十頭橐駝二十二頭器械
鎗刀亡算虜殺我軍佟尚仁一人傷秦得倚等二百
五十九人馬一百四十五騎於是制置使楊兆及都
御史張學顏奏捷大宗伯乃移咨太史爲文太常
治祭品遣告郊廟而會五月初十爲高皇帝忌
辰於是以初九日宣捷十一日請上御門公卿行

慶賀禮

賜李成梁以下爵賞金錢幣帛有差是時

上有詔言朕方行嘉禮有此大捷實天地祖

宗默祐朕心深切感仰着遣官祭告郊廟以答洪

庥已賜大學士張居正呂調陽申時行廕賞皆以

書辭上乃詔曰該鎮大捷實卿等運籌之功陞廕

非濫既懇辭朕勉從賜元輔銀一百彩段六表裡次

二輔各八十四表裡以示褒嘉其十一月速把亥入

河東其十二月引炒花煖太老撒卜兒亥恍惚太壁

遼河李成梁復躬帥車騎馳養善木直擣圍山斬首

捕虜大率八百八十二級奪獲馬牛羊器械亡算先

是虜以二萬騎從東昌堡亂柴口。深至耀州。李成梁先使百金之士捕伏海州。出不意斬首二級。奪獲馬一十五騎。故事。各邊獲功。奏捷俱先議賞。資其陞。廕候勘明行。於是制置使梁夢龍及都御史周咏奏捷。皆請比。先朝劉江之封廣寧伯。以倭首七百級。曹義之封豐潤伯。施聚焦禮之封懷柔伯。東寧伯亦不過以首虜四五百級。而況成梁先時擊破逆梟。斬首捕虜至一千二百餘級。今北虜一級已足倍東虜。宜加封爵。於是大司馬方逢時請咨。太宗伯擇日。大鴻臚導引使者至御前宣捷。上有詔。言該鎮屢獲。

奇功朕心加悅。依擬奏告郊廟。用答神庥。時戊寅

正月也。上特諭內閣。昨日遼東捷報非常。卽奏聞

聖母。蒙面諭朕云。賴天地祖宗默祐。此時正

爾嘉禮之際。有此大捷。乃國家之慶。我心甚喜。元

輔運籌廟謨。二輔同心協贊。纔得建此奇功。我勉留

張先生。這是明效。朕恭對云。聖母慈諭。略是茲恭

述以示先生等知。一應叙錄。宜從優厚。用稱朕拳拳

仰體。聖母至意。頃復有詔。詔內閣。昨見遼東塘

報。大捷比前次更多。朕心深喜。今日奏聞。聖母歡

悅殊甚。朕冲年踐昨。恒念德不足以格天。威不能懾

虜酋夙夜惕勵而邊臣奮立非常奇功誠如

聖母前諭天地祖宗默祐乃國家之慶元輔平

日加意運籌卿等同心協贊之所致也部䟽上時卿

等以此諭內閣着兵部馬上差人星夜前去與張先

生看將一應叙錄比前更優厚用示惓惓獎酬之意

久之賜李成梁兼太子太保廕一子指揮使楊兆應

一子百戶張學顏廕子陞一級皆世世勿絕金錢幣

帛有差陞賀濤一級姚天與二級他金錢有差復以

馬價二萬賚將校有功者賜本兵方逢時銀五十兩

表裡四之廕一子太學陞曾省吾部光先一級金三

十兩。表裡二之所司郎中皆陞俸一級。金十兩。餘皆八兩。賜梁夢龍金四十兩。周詠金三十兩。表裡皆二之後。以梁夢龍奏復賜爵賞金錢幣帛有差。先是保章擇巳卯正月二十二日辰時告廟。巳時宣捷。遣公張溶告南郊。伯楊炳告北郊。公徐文壁告太廟。如禮。巳。賜陞奏捷舍人崔勵等秩衣服二套。居五月。封李成梁寧遠伯。歲食祿米八百石。巳。給誥命及鐵契。得免死。遷梁夢龍俸一級。蔭一子太學。周詠復御史右丞。遷秩一等。遷張崇功唐朴秩一級。明年九月。土蠻遣速把亥略遼瀋開原。巳。聚兵四萬。

好村。祭旂纛卽馳磕力。其十月。虜騎五萬欲略遼遠。前屯衛不則攻山海關。於是臺御史張夢鯉因郵置以聞。其十二月。移壁遼河。聲欲犯海州。其明年正月。速把亥復引炒花。煖兒。伯言。以兒。鄧謀。欲略瀋陽。其四月。聲欲略遼瀋。其七月。與黑石炭聚五萬騎。哈亥惡卜各素議。期八日。馳拈喇丹林。聲欲馳廣寧。迤西山。海迤東間。其九月。虜騎六萬從慶雲堡。謝海臺。直走中固城。馬家寨。已入鐵嶺。東南熊官兒。多所殺略。賴漢兵追逐。還走殷家莊。平嶺。山頭臺。出邊。是時土蠻亦欲犯錦義。右屯。速把亥乃乘隙復聲欲犯薊。

之。遼東遼之河西。其十二月聚兵遼河。又聲欲略遼
瀋。其明年正月。上有特詔。詔內閣。今日風氣不祥。
恐有邊事。與先生等說。宜申飭邊臣。加意儆備。居頃
之。虜騎入湯河堡。旋退。裨將周之望追逐至羊兒山。
斬首二級。後復以二千騎從大鎮堡。長山。深入錦州
城。於是虜衆漸聚會。固已至二萬餘矣。漢使裨將馬
如龍去邊。旣行八十餘里。捕伏水獺河。虜以一萬奔
杏山。一萬分馳錦州四門。周之望殊疾力戰。斬首四
級。奪獲馬二十一騎。已復與王應榮等鏖戰。各劍斬
數賊。會矢盡力乏。兩人竟死於兵。是時遊擊徐恩指

揮鄭產出北門，裨將趙宋指揮王汲、張朝臣出東門，金鼓震天地。虜乃奔小凌河，小凌伏起，涂寬斬首三級，奪獲馬十三頭。高橋鋪伏起，千總高良弼斬首二級，奪獲馬四頭。杏山驛伏起，千總朱延慶斬首三級，奪獲馬三頭。其三月，速把亥倚遼河以爲險，將軍李成梁大戰，斬首捕虜三百四十三級，奪獲馬四百三十匹，盔甲八百有奇。乃以十六日宣捷，因祭告。

郊廟賜成梁以下金錢幣帛有差。其四月，虜騎一萬從孫真臺入，副總戎曹鼐追逐，斬首四級，奪獲馬二十騎。復至土臺，被虜圍急，賴裨將蔣位孫守廉毋承。

宣救得潰圍出虜復馳漢塞蒼頭軍丁援斬首一級
奪獲馬二頭千總陳鵬把總潘汝戢及親兵曹義等
死者三百有六十人輕重傷一百有六十六人馬四
百有八十六騎已復以三萬騎聲欲略遼瀋開原其
七月虜以十餘騎從沙坨臺入我兵斬首一級奪獲
馬三匹已復奔矮嶺斬首一級奪被鹵男子一口馬
三頭其十月虜騎二十餘從那木川入把總胥仲仁
追至韭菜窪斬首一級奪獲馬一騎頃之虜大入鎮
安鎮靖攻圍山堡盤山驛十三山驛殺略義州我兵
斬首捕虜凡一十八級奪獲馬索駝四十七頭虜亦

鹵我軍馮惠等六人。傷張勲等五十二人。奪糧糈二千一百八石。燒毀廟宇二座。旦日復從大清大靜堡出邊。是時李成梁度虜入秋。毫亡所利。必且復入。乃選輕銳之卒尾虜後。得亡恙。其十二月。虜以三十騎從寧遠堡。驚窩臺入。我兵追至媒婆溝。斬首二級。奪獲馬四匹。其明年四月。虜四十餘騎從代子河墊深入。我兵追逐大林子。斬首五級。其三月。虜騎七八十從鎮西堡入。我兵斬首一級。已復從木空臺追逐。斬首一級。已。追亡至盤嶺溝。斬首一級。已。從鎮北堡安寧臺入。我兵追亡至矜狗石門。斬首三級。自是之後。

速把亥使班字束。及那亥爾只額捕伏塞上。聽漢師
擊羊。令男把禿兒伯言顧馳清細河。已使他刺亥。大
力紅傳箭到關欲買賣。而速把亥亦躬帥二千餘騎
詣鎮夷堡。大將軍李成梁乃提叅將李平胡等兵鏖
戰平胡射最工。乃貫弓執矢鄉速把亥。遂中左脇墜
馬。蒼頭軍李有名亟割首級。是時泰有功。亦斬河木
寨。宋尚仁斬十兒女。皆有名渠卒也。餘黨悉奔。泰得
倚乃從大清堡出追。一夜馳大青山去。邊一百三十
里。李寧斬首五級。李有華生得額孫兔一人。於是速
把亥弟炒花及姪老撒十兒愛皆去帽頂冠孝。老小

盡兒啼謀欲藉兵於土蠻以報怨而其妻哈屯妹夫
花大卽裹屍到營以布殮。築塔毋戶渡下。因治房子。
率其酋長九家。家一人守冢。頃之。把兔兒至。諸酋東
西瞭山。把兔兒乃告曰。我卽有如有不可知。卽舉烟。
若卽蚤自來也。是歲萬曆壬午也。於是制置使吳允
臺御史周詠。總戎李成梁。皆後先以捷奏。先是御
史馬允登訪誅納長昂。及西虜打兒漢。漢親速把亥
姑翁也。皆言速把亥伏誅有狀。是時王台夷使札卜
失言亦如之。於是大司馬梁夢龍請容大宗伯行保。

前宣捷如故事。自是之後。大司馬論功行賞。而輔臣大司農。及給諫陳謨。御史皆以例不及論。論制置使臣吳允。御史右丞臣周詠。寧遠伯臣李成梁。當特議副總戎臣秦得倚。叅將臣王維貞。臣熊朝臣。臣李平胡。臣李得全。臣孫守廉。遊擊臣蘇國賦。臣蔣位。中軍臣李宗召。當陞賞。備禦臣李興。臣李塗寬。臣詹承祖。旂鼓臣孟學詩。千總臣唐伯美。臣張世爵。臣岳高。臣胡尚忠。備禦臣朱延慶。安蓄。當陞賞。遊擊臣楊士觀。把總臣毋承宣。當量賞。兵備臣周于德。臣李松。臣靖四方。分守臣張崇。苑馬臣洪濟遠。當上賞。副總臣徐

技。叅將臣羅思聰。通判臣蔣思極。知州臣張指南。遊
擊臣周思忠。守備臣李如梧。王有翼。備禦臣張箴。臣
房承祖。臣金鳳來。臣李應時。把總臣胥仲仁。當量賞。
是役也。首功雖出李有名。而中傷實李平。胡當應并
論。乃議遷平。胡都督僉事。仍加副總戎秩。有名授正
千戶。俾世世勿絕。於是 上有詔。賜李成梁金一百
兩。大紅紵絲蟒衣一襲。復賜第宅一區於京師。下大
司空蓋。許遷廕子爲指揮。世襲。遷吳允大。司馬兼
御史左丞。陞周詠。俸一級。皆廕一子。錦衣百戶。世襲。
賜勅。獎勵。金錢幣帛有差。遷李平。胡秩三級。系尋奇。

等二級。李寧等一級。賜周于德等金二十。王維貞等十五兩。李松等十兩。徐枝等八兩。重賞李有名。發馬價一萬。犒諸校有功勞者。賜梁夢龍金五十兩。表裏四之。廕子得世襲。陞王一鶚。張佳胤。俸一級銀三十兩。表裏二之。陞所司郎中一級銀十兩。他皆一兩。先是。劈山之捷。給諫光懋以爲實土蠻部阿丑哈。一日以盜牛馬故。懼誅。群輩千餘人。亡抵漢塞。遊擊陶承學誘而僇之。至上功幕府。凡四百有奇。其後大司馬方逢時。按御史安九域議。奏對。詔制置使梁夢龍。臺御史周詠。總戎李成梁。准辭免。原加恩典。陶承學

下御史逮問翟繡裳馬衛都王有臣皆免官速把亥一名速卜亥一名蘇把亥爲泰寧衛酋長生四男長卜言兔又名栢彥務次卜言把都兒又名把兔兒次卜谷次勺里兔又名召里兔始速把亥伏歐刀死尚披戴盔甲臂手漢使降夷長漢往驗級級大如斗也

讚曰

以余所聞遼左東起開原西抵錦義大率千五百里乃所在皆可入犯乎嘉隆以來虜患何歲亡之甚至殺大將軍如艾草管甚哉速把亥之爲禍首也而果力箇黃勇實有以導之然兩人亦旋受其咎酷矣道

家之言毋爲戎首豈虛語哉劈山之捷說者尚有後
言不然諸將軍且與驃騎爭烈矣古者封爵之誓曰
使黃河如帶泰山若礪國以永存爰及苗裔凡爲將
願方此意哉願方此意哉

上言兔上言把都兒列傳

上言兔速把亥長男也。又名栢彥務。始速把亥妻哈屯生四子。長上言兔。次上言把都兒。次上谷。次勾里兔。於是昆弟相率而報先人之怨。曰：非得東西虜莫可者。當是時。把兔兒則有叔父抄花妹夫花大黨之。皆藉藉有威望。胡虜聞而獨上言兔。勾里兔亡所知名。兩人由此思朶顏有長昂之酋。西虜有打來明暗之酋。東虜有火羅赤之酋。皆夙夕以阿父故。頗有積怨。深怒於廣寧。於是從之而起也。而會龍兔伯言。瓜兒兔。以兒鄧額叅委正。大小打刺漢委正。黃台吉。亦

欲入開原。唐寧東西廼聚黨數萬人。期五月十三日。撲捉瀋陽靜遠堡。於是遊擊韓元功馳救。居一二日。元功使把總陳九疇。黎文重。出威遠臺。誦諸虜。虜乃馳三千騎。吹掌海螺。張旂志。舉火鳴砲。送奉馬牛羊入堡。元功急使章渙然堅壁城守。卽躬提兵挑戰。是日自寅至巳。勇氣益倍。前亡倦虜騎漸增。元功兵大率減什二三。寡弗當。竟被金痰死。我兵徐永福等死者凡三十二人。馬凡一百五十九騎。傷凡三十人。自是之後。復以五萬騎牧馬遼河以西岸。謀欲略遼陽西古城。謀者覺。具以實告。於是傳分守使及備禦使。

何應魁提裨將羅維冕備古城先是四月二十二日
中貴人張誠於會極門傳奉特旨昨日風狸陡

作塵沙蔽日朕心驚惕靈臺來奏主有邊兵着兵部
便馬上差人傳與薊遼等處督撫總兵等官慎加防
備毋得疎懈居亡何備燕河路者將徐從義以長昂
做告備臺頭路者將解一清以栢彥務勾里兔做告
備石塘路者將羅思聰以打來明暗做告是時東虜
銀燈大委正把兔兒召里兔方擁精兵二萬在養善
木臺御史李松與大將軍李成梁度把兔兒等必窺
河東乃令深溝固壘以待諸虜騎一日卒然不可知

是歲萬曆乙酉也其二月虜以萬騎犯蒲濬其三月我兵先伐其謀得亡虞其五月虜騎犯十方寺已犯長勝堡於是暑草漸茂猶虜日驕橫志未嘗不在大逞賴渾河河深不可渡竟還歸此豈非天所以限南北哉已酉虜三百騎又犯錦川營遊擊祖承訓鏖戰斬首八級自是之後制置使張佳胤乃上書稱副總戎臣楊爕臣李平胡叅將臣孫守廉臣李興功叅將臣劉言遊擊臣章應選備禦臣張世爵臣霍九臯指揮臣王紹芳臣吳希漢有邊才 上有詔優恤韓元功當是時勺里兔尤從土蠻哉土蠻欲略河東遼陽

以報速把亥之役。會十有一月大水。勾里兔乃巡視三岔河水。水深。輒報曰。水堅可渡。

卜言把都兒。速把亥仲子也。又名把兔兒。隆慶初。黃台吉以昆弟六人顯。卜言把都兒以昆弟四人顯。四人皆逐牧哈亥額力素水草。然四人中莫有強於卜言把都兒者矣。由此兩人相爲引重。志未嘗須臾忘錦義。是時卜言兀亦欲報宿怨。於是大會卜言把都兒及黃台吉抄戶兒都刺兒那木大阿信等三萬餘騎。謀入白錦義。賴塞上幾火精明。並馳還。久之速把亥常椎牛遣卜言把都兒往清細河而會速把亥伏

誅。上言把兔兒卽推擇會長二十人。馳塔母戶渡視
父冢。諸酋乃東西山瞭漢兵。上言把都兒好謂曰有
如不可知。我卽舉烟火。若蚤自來也。是時往來者言
胡中皆以速把亥旣物子少。諸酋皆欲從瓜兒兔奪
開原。而不知上言把都兒已能枕戈泣血矣。先是王
畧男阿台聚黨爲其父復仇。一旦聞上言把都兒發
難。大喜卽從馬上傳花大炒花諸酋趨會兵。馳遼瀋
海州廣寧凡吾等所爲報先人之怨。令旣下所不亟
上馬旣窺左足而應者會長罰馬一百騎橐駝五十
頭。部曲馬八蹄。牛八角。於是把都兒卽引莽官大莽

骨塞從專難營藉助兵時癸未正月也其四月分道入長勇堡已遂與花大炒花大會老撒等牧馬遼河已入清細河東西擊城堡漢益發兵備鎮寧鎮遠鎮安鎮邊鎮夷團山諸堡虜乃復馳臥牛山裨將李仲武尹世威使使者捕伏山後於是平山東頭亂石山虜車煩馬怒夜半常聞蛩蛩如恐弗克也者旦日虜縱五萬騎直擣缸窰空臺虜我軍六人馬六騎殺八人賴援兵至於是李得全等斬首一級奪獲馬二騎餘黨悉遁逃出邊頃之臺御史周詠度虜必復入急使裨將李平胡孫守廉等備正安堡因捕伏三角山

虜果擊鎮靜堡得全。廼出輕銳之卒六百人。衝鋒會暮。卽鳴砲舉火。令返兵。旦日復出輕車甲騎夾攻虜。竟奔鎮遠關。於是三分虜。以其半圍東小台。缸窰空暗馬山諸台。以其半止壁缸窰空南嶺。以其半圍本堡。守備李仲武乃出弓矢鎗砲火箭如雷電。虜騎稍奔。堡南駕砲山。頃之復攻本堡東北面。仲武殊疾力如故。虜亦復退。頃攻圍門台。然每戰至日。虜輒環列馬門關。以絕哨卒往來。令不得馳報。是夜窺虜暫退。乃使蒼頭軍楊洪等五人下臺取火藥。虜覺。卽馳圍擊破燉臺。殺略我軍藥二等一十三人。卽移騎攻

前台及後光山台得全見圍困急躬恃關器衝鋒伏
虜並起轉戰皆無所得日晡得全復出堡挑戰虜見
鎮撫使親臨兵兵威甚盛稍退舍於是得被鹵計千
加龍承道等九人斬首一級奪獲馬三騎我兵傷高
文舉等八人馬十騎是時東小臺缸窰空瞭馬山諸
軍見鎮遠關臺被克多遂逃道逢伏虜鹵林雪二等
六人馬六匹殺吳效忠等八人先是黃台吉使使者
款鎮靜寨索增撫賞不可得其後五月十二日復引
五萬餘騎突攻鎮靜堡於是分巡使任天祚請於臺
御史李松因與總戎李成梁議議於大小黑山大出

兵詳爲北伐微使百金之士捕伏以撓東顧是夜遣
裨將李得全等馳鎮靜堡以爲內應旦日臺御史及
總戎親臨兵遊擊李寧以刀擊花大傷左臉復貫弓
射流矢中膊脰花大親上言把都兒私也虜營皆大
哭失聲盡捧頭鼠竄而去於是制置使周詠奏聞
後以阿台捷并行賞諸在阿台傳其六月十二日偕
董狐狸嚙金兒三萬餘騎犯遼陽廣寧會大風飛砂
石蔽面晝晦頃之雷電交作驟雨如注平地水深數
尺大靜大寧城傾頽者五十餘丈傷大寧廬舍尤甚
於是軍民盡徙大寧是日叅將熊朝臣亦引兵至廼

便夜不收劉志孝以旦日五鼓鷄鳴出邊旣行至大里山可五十里虜騎五千直走大邊正北臺舉火鳴砲分爲三枝一枝攻大靜堡一枝攻大寧堡一枝伏姜家山溝中是時副總戎李平胡及遊擊李寧千總秦得貴備禦朱延慶設伏鎮夷堡倉卒見虜至皆誓捐軀不顧一生急砍入大靜堡殊疾力虜始棄臨衝還歸獨大寧以堡官端世武中流矢死虜騎得循墻而入於是叅將熊朝臣把總李義引兵馳正義莊溝中伏虜起接戰殺軍民趙得功等一百二十三人馬八騎牛驢十二頭焚廬舍三十六所李平胡等復馳

救虜望見李將軍馬上奮髯而來皆失覓虜始遂走
盡出塞其後給諫張鼎思劾奏其事語在奏疏其
後年正月把兔兒并花大抄花老撒卜兒亥止壁遼
河已大會養善木謀欲略遼瀋海州其六月引著影
兔等犯清細河是時把兔兒徃徃群輩逐水草興中
興中去大寧爲近比肩錦義南可跨寧前西可薄古
北東可距舊遼陽也其明年二月速兔兒引瓜兒兔
又哈兒老思卜兒亥脫退脫卜戶馳十方寺頃之復
結連西虜以兒鄧萬餘騎直抵蒲瀋擊城堡殺略軍
民遊擊周思孝追逐出塞於是逐水草遼河河深虜

騎不能渡大將軍李成梁卽徵遊擊韓元功調集麻
板繩索赴丁字泊堡治浮橋出虜不意是時制置使
李松偕分巡使任天祚備兵使王緘亦親臨兵監軍
而以副使劉易從備附關備禦使章應選備鎮城民
部郎趙三聘轉餉期十七日皆從丁字泊堡出邊成
梁廼布陣爲一二字廼以一字陣衝鋒二字陣接踵
繼入敢議令及不如令者斬旦日寅時遂至打大去
邊一百五十里矣虜已先覺望見漢兵至皆跳驅挑
戰於是李成梁躬帥一字陣以火器火箭刀槍弓矢
並發制置使在行間趨三字陣鼓行而前虜乃股栗

不勝兵。漢兵乘勝勇氣益百倍。疾力戰斬首捕虜凡八百二十四級。得名酋捨征孛來。乞搭把失等首凡一十三級。奪獲被虜凡一口。馬凡五百四十九騎。盔甲臂手以千數。亡降夷羊羔兒。卜兒寨等凡十人。傷軍丁徐用謙凡二百一十六人。死張倉等凡六百三十九騎。旦日遂鳴金班師。自是之後。把兔兒常聲欲犯廣寧。福餘人杪賴胡蘆常從。煖兔伯言所得其情來告。自是之後。東虜一克灰正。及打亥灰正。黃台王銀燈。短弓兒皆後先欲犯寧遠。寧前及遼陽。迤西廣寧。迤東黃泥窪。輒城有狀。上方有特詔。昨日風霾。

大作邊境恐有虜敵兵部便馬上差人傳與薊遼等處督撫總兵官嚴加防備毋得疎懈時乙酉三月初七日也亡何臺御史張佳胤以捷因郵置聞事下大司馬張學顏問狀於是案臺史疏本大學士申時行許國王家屏運籌帷幄功顧以法不及論乃論臣張佳胤臣李松當優異臣李成梁當特加優異臣任天祚臣王緘當超擢臣劉易從臣趙三聘臣章應選臣張炯當賞賚臣唐伯美臣李如梧臣胡鸞臣胡尚忠臣宿振武臣王維貞臣孫守廉臣周思忠臣李宗召臣裴承勳臣佟養臣臣姚大節臣熊朝臣臣郭夢徵

臣查大受。臣李應時。當陞賞。臣李平胡。臣李寧。臣李興。臣李芹。臣劉言。臣李維藩。當陞賞。臣劉易從。臣趙三聘。臣章應選。臣塗廣。臣黃應魁。臣陸尚學。臣高貞。臣張朝臣。臣蔣國太。臣崔吉。臣霍九臯。臣何繼祖。臣郎維忠。臣劉秉節。臣慕承勲。臣劉仲文。臣董文貴。當陞賞。臣郎梅。臣李日增。臣韓元功。臣涂寬。臣史儒法。當左遷。請以功贖。臣張玠。臣毋承宣。臣張國忠。臣雷應坤。臣葛逢夏。臣朱文瀚。臣喬官。臣熊鑰。臣徐行謙。臣施國臣。臣高良弼。臣楊四維。臣吳希臣。臣黑雲鳳。臣趙芳。臣趙相。臣施應魁。臣羅繼冕。臣鄭應時。臣

陳文德。臣李祿。臣李有名。臣李有華。臣趙國禎。臣恭
邦奇。臣審國胤。臣李開光。臣高世武。臣張爵。臣彭國
珍。臣宿振文。臣金本健。臣王汝徵。臣佟應詔。臣申克
寬。臣裴邦翰。臣李尚仁。臣黃承恩。臣金尚禮。臣馮文
用。臣張光先。臣佟守位。臣尚大用。臣黃卿。臣張繼宗。
臣趙光祖。臣趙世臣。臣盧得功。臣張承祖。臣何九州。
臣王世福。臣李義。臣安本固。臣張冰官。臣魯友時。臣
郭恩。臣鄭大捷。臣王承恩。臣文磐。臣李國印。臣李希
賢。臣李貴。臣王珂。臣張伯芹。臣宋資。臣蔣鐵。臣尹承
武。臣李世功。臣宋國賢。臣王永執。臣趙維藩。臣崔繼

儒臣季得功。臣周選。臣曲中。臣張登瀛。臣王俊。臣張良棟。臣李惟屏。臣李伯。臣張世臣。臣高景時。臣李守仁。臣高仲先。臣張玉。臣張文材。臣楊繼祖。臣高傑。臣聞思聘。臣馮文學。臣趙良俊。臣戴升。臣鄒天福。臣劉得時。臣姜宇。臣于大用。臣劉文元。臣喻承功。臣辛雄。臣李景華。臣宋尚仁。臣李惟萼。臣于良輔。臣李世勳。臣李自泰。臣趙伯。臣郎惟忠。臣平聚賢。臣林添福。臣畢良富。臣褚萬金。臣劉守勲。臣王守臣。臣丁起鳳。臣樂世朝。臣王大厚。臣朱文良。臣趙廷用。臣袁承武。臣崔承祖。臣吳秉忠。臣胡一忠。臣劉相。臣陳府。臣高應。

選臣李維陽臣趙廷璧臣陳紹先臣鄭朝隆臣高夢
松臣陳體國臣韓奇功臣林國勲臣孫國相臣劉效
忠臣鄭洗臣鄭選臣金本重臣周似松臣高照臣皮
承德當賞賚於是上幸從大司馬議賜李成梁
歲加祿米一百石遷廕子秩三級復以勅勉勵之加
張佳胤太子太保遷廕子秩一級世襲遷李松左司
馬遷廕子秩一級世襲亦如之金錢幣帛皆有差賜
任天祚等秩一級唐伯美等實秩一級李平胡等銀
二十兩劉易從等秩一級銀十五兩張炯等十兩復
等秩如故發馬價銀等勸犒軍士有功勞者

賜本兵張學顏誥命王遴陰武卿石星金錢幣帛有
差所司郎中皆賜十金其五月把兔兒聚兵養善木
聲欲犯廣寧語在伯彥務傳頃之同西虜以兒鄧捨
臣台吉等犯十方寺不克去犯長勝堡又不克去犯
靜遠堡又不克去犯榆林堡漢兵斬首捕虜凡七級
其間九月復與西虜以兒鄧黃台吉委正以克歹青
額叅委正拱兔台吉阿民台吉煖兔小歹青并五路
男哥兒馳呵呵莫林聲欲犯三岔河西沙嶺迤南吳
家墳有如泥瀾卽入錦義清細河是時銀燈亦以逃
犯亥故犯遼瀋大將軍李成梁行捕至古路半那林

去邊三百五十里。斬首一百有八級。語在銀燈傳。其
明年二月。犯前屯。裨將陳嘉寵。楊紹祖。斬首虜三級。
奪獲馬三十一騎。頃犯開原。裨將宿振武。斬首虜二
十一級。奪獲馬二十四騎。亡何。土蠻欲馳廣寧。購重
賞。於是把兔兒。杪花花。大老思。十兒亥。先聚黨以待。
以爲土蠻索漢重賞。必漢或不予。卽不予。則吾等從
中起。漢烏能智及此。而臺御史顧養謙。則先已調得
其姦矣。乃以羽檄徵叅將黑雲龍。李惟藩。遊擊佟養
正。李文芹等兵。合營爲一二字陣。如故事。期二十五
日。皆從鎮邊堡出塞。二十七至可可毋林。去邊二百

餘里成梁躬帥諸將大戰數十合。自辰至未不憊。虛
皆騰山鑽林。始如蜚。成梁復追亡逐北。斬首凡九百
有二級。中間得名豪酋長虎兒處把禿等凡二十四
級。奪獲被虜男婦凡七十八口。馬牛羊橐駝凡千四
百四十有奇。死者亡算。盛甲臂手亡算。官軍亡徐良
臣李受等凡二十四人。傷李寧李興查大受等凡一
百七十八人。馬八百八十九騎。於是制置使王一鶚
奏捷。事下大司馬張佳胤問狀。故事遼東報奏遣
御史辨驗覈功。乃以御史王國弼往。先是。上有詔
凡遇報捷。巡按御史卽辨驗首級。十日內具奏。看覈

功次一月內具奏陞賞者爲令。國刑旣至得其狀如制置使御史中執法請。上幸賜李成梁廕子秩遷三級。遷王一鶚御史右丞兼右司馬。顧養謙御史右丞。金錢幣帛皆有差。陞任天祚趙三聘俸一級。陞楊燮署都督僉事。加李寧李成查大受孫守廉銜視總戎。他裨將皆受賞如初。犒軍發馬價五千。賜本兵張佳胤及蕭廩所司郎金有差。其明年四月復糾以兒鄧等聲欲犯遼瀋。其十月欲犯河東河西。頃之虜騎七八萬果從外邊。平山迤西黃個子起營入清細河。李成梁尾至王謙屯斬首二級奪獲馬二騎。旦日

李寧李石華泰得貴馳躡山斬首虜二級虜騎還奔
南台營百總楊繼昂等馳開州屯斬首二級奪獲馬
三頭已奔戚家石家滅家大定諸堡多所斬獲語在
以兒鄧傳其明年正月偕以兒鄧黃台吉往硃砂碛
聲欲略遼瀋於是裨將高良弼提降夷乃六脫庫等
出硃砂碛去遶三百餘里道逢虜三千餘騎於是降
夷十列奎十花虎刺義阿只十我兒革妹脫庫升奈
得勒十賴果羅太阿寨孩子虎喇哈赤奴才賴挑戰
斬首虜七級久之降夷願得賞每級賞五十兩若亡
何虜騎三百從周千住墩台兩空入而以三千騎捕

伏邊外。周千住兵威甚設。虜乃馳新舖可七里。殺黃
欽等十四人。鹵李忙漢等三人。牛驢二十五頭。燒徐
道廬舍四十三所。已殺三里屯男子梁景松。李伯雲
等五人。燒李皮廬舍三所。牛三頭。已殺堤河屯男子
劉敢生一人。鹵張小廝等五人。牛一十一頭。燒聶萬
良廬舍九所。於是備禦使古大相及宿振武追逐斬
首一級。奪獲馬四頭。是時李平胡。李寧亦馳至三公
河上堤屯黑窪石。虜已遠遁矣。其二月虜騎二千從
西平堡平山台入射我軍。楊汝節等六人傷。楊春等
五人鹵。俞氏一人備禦使楊紹先逐急。虜乃退。旦日

李平胡姚大節。李寧。李興。孫守廉。查大受。從鎮遠堡。樣台。西空出邊。行至遼河九十餘里。鏖戰。斬首三十。七級。其四月。聚卜言。顧老撒。卜兒亥。煖兔。伯言。兒三。岔河。迤西沙嶺。高平。大小黑山。頃復犯清細河。聲欲。相仇殺。於是鎮靜備守。使鄭應時。帥裨將佟加慶。楊紹先。嚴燧。火語。在黑石炭傳。其八月。副總戎楊變。使把總楊萬里。提降夷阿卜當。家丁江達子。捕伏養善。木。去邊二百餘里。虜騎一百五十。挑戰。於是阿卜當。江達子。奮死不顧生。疾力戰。虜還走。阿卜當追逐。斬首二十級。奪獲馬二十一騎。我兵亡陳楠等二人。馬

一十五匹。傷王佐等九人。馬一十一匹。其九月虜騎從石河口臺入。漢兵追逐。斬首五級。奪獲馬五頭。填之。把兔兒偕土蠻男卜彥大會一克委正。及其叔父燒海召力兔。三萬餘騎。聲欲略廣寧迤西。以雪速把亥之怨。其十月。虜騎至十餘萬。皆從黃佃子黑松林平山。馳大邊新臺入。圍鎮靖所。計欲分犯廣寧錦義。是時虜營去廣寧城西不過四十里。止隔間山耳。而牽馬嶺盤嶺皆通道。於是副總戎李得全提裨將王通高良弼馮文用陳一諒趙啓光宋時和李繼功等兵五百人。備牽馬嶺遊擊涂寬提兵三百人。備盤嶺。

虜乃以其半走鎮夷沙河營。殺臺軍畢，伏禮。夜不收李元得洪旺等十人，馬九騎。營中弓矢鎗刀甚備，不可下。乃走柞頭山，奪王大等糗糧九十餘石，焚廬舍三十餘所。已走鐵場屯，殺吳天祿等三十八人，奪韓文學等糗糧一千二百餘石，焚吳志高等廬舍四百餘所。於是攻大靖堡，備禦使李都率軍餘衝鋒斬首一級，奪獲馬一騎。虜竟深入程羊屯，已入凌河堡，已入孫寬屯所，犯四十三所，殺何住等凡四十六人，略王金等三十五人，奪糗糧二千餘石，燒王守祖等廬舍一千五百餘所。都御史顧養謙見爲虜騎逼近鎮

夷堡。益發營兵八千人。分隸諸將軍。視緩急更調。要之皆備。鎮夷堡。以鎮夷堡。故曩時殺速把亥仇地也。亡何。虜先以四千餘騎。馳牽馬嶺。李得全益嚴軍令。令火炮。火箭。弓矢。槍棍。並發。虜還走塔兒山。止壁頂。復以精騎三千。馳盤嶺。余寬亦禦之甚備。然我軍死楊仲金五人。傷張尚恩一人。馬十匹。不及牽馬嶺。得以全爲勝矣。虜於是走亦順溝。瓦子谷。旦日竟從小鐵場屯。分二枝。以一枝攻驛。以一枝屯南北山。山皆高。直下視之。可得堡虛實。矢石直達城下。李得全復以火箭。擊兩山虜馬。虜馬驚不能上。遂犇而下。

走我兵追逐。斬首虜凡三級。奪獲馬凡三騎。時二十
二日也。其後攻鎮夷堡。城上飛砂石。萬弩並發。如雨。
而下不可逃。軍中益擊力斗。鳴金鼓。如是者三晝夜。
不交睫。虜於是度勢不可下。乃頓足嘆曰。嗟乎。事今
不可爲矣。阿父夙怨。豈終不可報乎。乃以二十四日
從大清堡。白土廠出塞。是時裨將李興查大受等。見
賊未南下。皆提兵馳義州城。戚家堡。北援既至。則虜
已去矣。並止壁鷄冠山城。頃之。虜復攻山城。兵壯郭
景陽。以槍砲石矢。擊傷甚多。旦日攻昶家屯。擊傷亦
如之。虜始盡出邊。遊擊黑雲龍。提兵馳陳家莊。鏖戰。

奪獲馬三騎。虜亦殺我軍丁薛金等三人。馬六匹。傷
二人。其二十七日。鎮撫使使裨將高良弼。李繼武。陳
守義。王鳳鳴。吳大績。提兵從大寧堡。青水墩。出邊。尾
虜後。擊虜情歸。乃以降夷卜向花爲耳目。旣行三日。
至卜兒克力。去邊則已三百餘里矣。會大雪陰霧。於
是帥官丁降夷李尚義。李尚順。卜向花等。大戰破之。
斬首捕虜凡三十五級。奪獲馬三十七匹。盔甲皆八
十。虜亦傷李尚義等八十八。馬四十八匹。是歲萬曆
丁亥也。居五六年。癸巳冬。把兔兒。花大。抄花。約西虜
小歹青。及五路哥兒。欲略清細河。其明年二月。馳舊

遼陽欲從關門迤東奴台入。其四月復引上言顧脫合赤老撒。卜羅愛。六千餘騎。欲從關東雙台大小黑山入。皆欲略攻尅堡。於是以兒鄧。反青。宰桑。卜言兔。亦欲略錦義。清細河。賴李平胡等追逐。斬首一十八級。奪獲被虜鄭大漢等一百七十一人。馬八十四匹。語在炒花傳。其九月。伯彥引一措委正。把漢委正。銀燈。腦毛大等。十萬餘騎。聲欲犯廣寧。是時孫鏞爲置。置使李化龍爲臺御史。董一元爲總戎。皆大議以爲土蠻久物故。而其子。卜彥。周嗣。其種類雖多而強乎。然大舉有時。而獨患苦把兔與炒花耳。且所居在

舊遼陽以北。適兩河之中。東可犯遼瀋。西可犯廣寧。南可犯海蓋。以故把兔兒。春夏則擁衆以抄略。秋冬則導北虜。闖入漢關。常自大言曰。我先剗爾眼耳。然後剗爾心腸。眼目者。華言墩台也。心腸者。華言城堡也。其芥視全遼。類如此。於是度把兔兒。不過萬餘騎。以爲誠破東虜。則西虜當不戰而走也。臺御史乃與總戎刑白馬以盟。必滅此而後朝食。其十月。虜乃從小周台。深入吳家墳。是時西虜已近邊。有言宜擊東虜者。大將軍董一元。以爲其下環海多潮溝。盛蘆葦。我兵不得成列。卽幸而戰勝。殺傷大相當。卽西虜一

日卒然有急。將何以待之。而况虜見我兵扼其歸路。必堅壁弗出。居一二日。有如西虜深至右屯。勢必合而我兵氣已奪。可不戰而自潰矣。於是以兵匿鎮武堡。空其營盤。亡何虜果馳營盤。營盤空無人。虜皆鼓掌笑。以爲漢兵誠畏我遠匿。乃率諸虜騎深入。過者未大半。我師僉卒從中起。循牆而進。虜皆大驚。懾。竄。疆扶持手足。搏戰。我師自午至酉。不倦。亡何虜益不能支。倒戈。董一元追逐三十餘里。奪回被鹵人畜。復追逐四十餘里。至白沙碛。斬首捕虜凡四百一十六級。橐駝馬牛羊以千數。是時酋首伯言兒。中流矢死。

把兔兒亦被傷虜以故愈急所不死者皆棄甲自投
轡空馬而逃於是馬牛羊橐駝及鐵鍋氈帽積若崇
丘。是夜虜奔馳如狂。天明然後駐馬聚哭。卽風聲鶴
淚虜皆以爲晉兵至矣。非復曩時阿虜也。明日西虜
果至右屯。深入吳家墳。見墩軍。問把兔兒安在。墩軍
具以實告。於是驅橐駝走廣寧平虜。遂奔團營。由此
攻右屯。五日不下而去。先是伯言兒在胡中最僇悍。
常逮慶雲守備使王鳳翔出邊。罷市賞。今一旦物故。
胡中如失左右手。於是把兔兒及十言台周瓜兔兒
反青。義哈兒復聚兵。期正月略遼瀋東西。董一元廼

先伐其謀。將兵至拴道。去邊四百餘里。把兔兒則以鎮武堡傷重。竟物故矣。我師斬卜勒亥。汪那呵等首。凡一百一十級。獲生口一十人。語在上言台周傳。於是臺御史李化龍奏捷。上有特諭。諭中貴人張誠。於會極門傳示。昨日內閣揭奏。虜賊入犯遼東。總兵董一元等。督率將士。扼險露宿野地。臨陣奮勇。斬首至五百餘級。駝馬夷器近千。是皆仰仗祖宗威靈。神武布昭。鎮撫效勞。助可加尚。你部裡便馬上差人傳示該鎮文武。同心僉力。慎加防禦。速將有功人員。即便查報。先行慰勞。還着巡按御史上緊查勘。奏

聞立限與他故諭頃之。發馬價二萬兩。前去賞勞。以示獎勸。居月餘。御史宋興祖以勘功疏。上事下大司馬石星問狀。故事。輔臣及兵科雖有大勲勞。不叙。以故大學士趙志臯。張位。陳于陛。沈一貫。及給諫吳文梓。皆不敢槩論。上廼從大司馬議。賜董一元陞左都督。加太子太保。蔭一子指揮。世襲。陞孫鑛御史右丞。蔭一子太學。陞李化龍右司馬。蔭一子執金吾千戶。世襲。金錢幣帛有差。是役也。叅政臣王邦俊以從征。賜爵二級。金三千兩。表裡二之。郎中臣劉三才以轉餉布政臣郭性之。叅政臣梁雲龍。兵備臣蔡

可賢以應援皆 賜金三十兩。總戎臣李平胡。賜陞
左都督。仍陞實職一級。副總戎臣張世爵。 賜陞都
督同知。仍陞祖職一級。皆 賜金五十兩。表裡二之。
叅將臣祖承訓。賜都督僉事。授副總戎。臣方時春。賜
秩視副總戎。遊擊臣張奇功。臣曹文煥。賜秩視叅將。
遊擊臣董用威。賜除罪。臣涂寬。賜復祖職。臣李如梧。
賜銜視叅將。臣王德義。加僉書秩。臣王維真。復祖職。
他皆賜金錢如初。賜本兵石星。加少保。兼太子太保。
金五十兩。紵絲飛魚衣一套。李禎。銀三十兩。表裡二
之。所司郎中金十兩。他皆八兩。始速把亥。坊時。胡中

皆以子年少。亡能爲欲從。爪兔兒卒之枕戈泣血。常擁十萬騎。出萬死。不顧一生。惓惓欲報父仇。仇卒不可報。竟死鎮武堡。君子於是乎謂把兔兒於鎮夷堡。乃蚤自得解免。不相從阿父於地下也。

讚曰

然毒之於人甚矣哉。王者尚不能行之於臣下。而況夷虜乎。余觀上言兔把兔兒欲報鎮夷堡之役。未嘗不悲其志。及見藉兵西虜。以甘心於遼。又未嘗不恠廣寧東西間。廼亦甘心於虜哉。卒之董將軍出塞三千餘里。把兔兒身死人手。爲遼西快。則又未嘗不爽。

然自失矣宜廟議請比曹真我焦禮施聚封爵事而
增董將軍當伯也

炒花花大列傳

炒花。虎喇哈赤季子也。嘉靖中。炒花最稚弱。黃勇常亡抵於穹廬。易之。竟歸。速把亥久之。速把亥略廣寧。炒花輒執干戈往從矣。隆慶初。復從酋長黑字羅等萬餘騎略河東。稍稍稱強。明年速把亥反。青馳鵬背山。使者十餘輩約炒花。炒花至。然後入丁字泊。居一二年。遂與土蠻相仇殺。於是速把亥委正。炒花聚兵羊腸河。詳言擊土蠻。廼欲患苦我河東遼陽間。其明年。上卽位矣。捕漢兒及董狐狸。皆聚兵禡伏。往毛挨兔巴。捕伏鵬背山。去邊七十里。常使數十騎往來。

調塞上。因誘漢兵計欲撤我東備。悉以衆攻瀋陽鐵嶺。總戎李成梁擊破之。斬首捕虜凡五十七級。奪獲馬凡二百有七騎。頃之大會土蠻營。聲欲略廣寧。錦義塞。漢使蒼頭軍李平胡視中遼河。去遼一百餘里。是時虜騎皆精兵。李成梁廼欲先奪其壘。以伐其謀。於是出塞直擣虜壘。擊破之。斬首凡三十三級。其明年春。虜見大兵至。廼中分虜。而以半東行。以窺遼瀋。以半西伏。以襲錦義。語在速把亥傳。是年冬。虜以略錦義不遂。復欲入大小黑山。開原鐵嶺。瀋陽之間。其明年炒花出所鹵通事寶聰至寨。已大會黃台吉。黑

石炭。上言台周以兒鄧堵刺兒。煖兔。拱兔。搭勞亥。二萬餘騎從平虜堡南靜九臺空入。副總戎曹簋追逐至國公寨。斬首捕虜凡一十一級。奪獲馬凡四十八騎。虜乃棄鉤杆。與漢兵相持頃之。叅將唐朴。備禦黃都。楊四德。馮文弼。孔東儒。蔣國泰。自北而至。副總戎傅廷勲遊擊王維屏。備禦丁倣。守備郎官。自東而至。於是李成梁見爲榆林鋪地形於馳逐不便。廼移壁平虜堡。而以傅廷勲等兵居瀋陽城外。列車下營。以示有備。亡何。虜果馳瀋陽營中。砲鳴如雷。虜乃犇西北高墩。成梁明而習於計。度虜必從故道出塞。廼帥

輕銳之卒六千人。而以三千人爲一陣。陣大率類一
二字。居左右如列眉。而又四千人爲一大營。營居中。
於是將軍令曰。兩軍將進戰。先期中軍擊鼓。一字陣
軍。聞鼓聲。卽魚鱗而入。然後二字陣軍接踵。火炮火
箭火鎗俱發。是時虜亦擁萬餘騎。約長二十餘里。列
左右如漢兵。旣至堡南八里。成梁乃令營中擊鼓。傳
發諸軍。皆鼓行而前。先以火炮擊傷甚多。成梁親提
兵大戰。自己至未。殊疾力。把總許繼恩挽戰車尾。虜
後砲火震天。虜乃棄輜重反踵走。成梁追亡逐北。至
河溝。水深十餘丈。馬牛橐駝盡傾跌。充盈河溝十餘

里我兵乘勝渡河擊殺以千數會暮取浮屍斬首凡
二百有七級奪獲橐駝馬牛羊器械亡算我官軍死
者二百七十餘人其明年春炒花偕土蠻速把亥欲
雪平虜堡之憤乃使精騎往來旁近塞訶邊先是制
置使楊兆總戎李成梁度虜卽至必以二三月入塞
當先使零騎捕伏塞下迺簡丁夜備東西塞亡何虜
使至兵起山虜使不意不暇走斬首一十六級自是
之後虜益美西虜及海西王台貢賞其明年聚兵二
萬餘騎略海西是時速把亥炒花哈屯委正歹青黃
台吉堵刺兒莽忽汰董狐狸長昂長兔實志在犯全

遼見東隅燄火精明不可入廼詳示北遯以緩我兵
頃之僉卒從威遠堡突入大將軍備兵甚盛旋追逐
出遯虜之傷石矢者亡慮千餘人是歲萬曆丙子也
其戊寅春正月黑石炭及青哈屯炒花速把亥七萬
餘騎聚捨刺毋林詳言搶王台頃之廼馳遼陽瀋陽
開原挾求貢賞詳言欲人犯誘廣寧兵西防因移壁
劈山於是李成梁欲先伐其謀乃帥遊擊陶承學叅
將姚天與等期十九日直擣劈山去遯二百餘里李
平胡望見穹廬皆紅纓其南道可擊亟趨諸軍進戰
破之斬首捕虜凡四百三十五級奪獲馬四百七十

七頭橐駝二十二頭弓矢器械亡算自是之後炒
及哈屯歹青速把亥等益擁精騎少者一二千多者
五六千人皆披帶盔甲張弓露刃到開原要賞因公
行劫略先是去年六月入市頃之卽略軍餘七人牛
十九頭殺餘丁三人七月略餘丁九人牛五頭十月
殺餘丁五人略軍餘四人馬牛驢三頭其明年炒花
速把亥兒漢煖兔老撒卜兒亥恍忽太三萬餘騎從
東昌堡亂柴口入深至耀州裨將秦得倚等追逐斬
首二級奪獲馬一十五頭已大會黃台吉於遼河成
梁躬提兵衝鋒大戰圓山擊破之斬兒度等首虜凡

八百七十九級奪獲馬一千二百四十八頭橐駝十六頭盛甲器械亡算虜亦射我兵蔡繼祖等一百四十四人馬二百八十八匹於是制置使梁夢龍以捷聞上祭告郊廟賜金錢幣帛有差先是部夷阿都亥等千餘人亡抵養加奴已炒花覺使使者索之於是得把漢那木賴執而殺之阿都亥懼誅易名我兔亡歸漢漢塞執而僇之頃給諫及御史安九域請論如法其明年益聚黨略潘陽其明年偕土蠻深入凌河殺略甚多其明年炒花與克石炭煖兔伯言以曩時所鹵略不如願聚黨二萬餘騎復欲略遼潘開

原其明年春速把亥伏誅炒花廼與其姪老撒卜兒
愛悲憤益亡聊旦莫思欲一逞於漢於是亟走土蠻
罕專以報仇爲務矣是歲萬曆壬午也其明年春逞
加奴仰加奴及王台男虎兒罕赤亦相仇殺於是炒
花把兔兒花大老撒卜兒愛上言顧並上馬誓竭力
以報鎮夷堡之役廣寧錦義之間蕭然苦兵矣頃之
粟馬遼河其夏略細河及關門東西直擣臥牛山復
馳缸窰空臺東小臺漢兵追逐出邊亡何擊馬門關
鹵我兵隨來等一十餘人裨將李得全轉戰奪獲六
人斬首虜一級漢兵傷八人漢馬死者十匹其明年

春同西虜以兒鄧攻永安堡。劉登泰斬首七級。攻三山營。遊擊陳朝陞斬首一級。攻寨兒山。叅將楊燮斬首二級。攻椴木衝。備禦蔣國光斬首五級。攻大寧堡。叅將熊朝臣斬首二級。其夏。粟馬舊遼陽。是時大小打刺漢。委正黃台吉攻城堡。急銀燈把兔兒亦。粟馬養善木志皆在窺河東。其明年秋。大會以兒鄧。阿民台吉。小友青。及五路男哥兒等。馳呵呵莫林。聲欲犯三分河。西沙嶺。迤南吳家墳。爲速把亥報仇。其明年春。炒花把兔兒花大老思卜兒亥聚黨十餘萬。止壁阿亥塢。期土蠻並馳關市下。購大賞。不則卽連虜騎。

入塞頃之炒花使使者索速把亥厝甲諸什物必欲得一事以爲遺念成梁廼先提兵出呵呵毋林去邊二百餘里虜望見漢兵至皆披甲兵上馬接戰大破之悉犇逃成梁乘勝行捕斬首二十四級奪獲破鹵湯住等二十二入幼夷七十八人其二月復五十餘騎入三山營遊擊陳加寵追逐斬首二級奪獲馬三十一頭頃之三百餘騎復入永寧堡追逐斬首二十級奪獲馬二十四頭其四月聚黨遼河聲欲略瀋陽其十一月大會西虜一克委正土妹哈不趣台吉捨刺大以兒鄧東南視老河河淺略河東不則直走河

西是時黃台吉及黑石炭銀燈一克歹青把亥歹青一克大成把亥大成抽口兒大小委正椿臣台吉並擁精騎七八萬粟馬烏峯塔待炒花炒花乃使使者哈刺亥字字戶言諸虜皆從平山迤西黃佃子起兵入錦義清細河炒花以躬欲到關市有他請未從頃之炒花竟帥諸虜騎從鎮夷堡入乃使零騎攻城堡堡備兵甚固無所獲漢兵斬首捕虜凡四十二級奪獲馬六十騎上幸從左司馬楊俊民議賜李成梁顧養謙金二十兩表裡二之紀錄劉易從李平胡金十五兩李得全十兩涂寬五兩其明年

諸虜聲欲犯廣寧。成梁先提兵馳上刺阿兔。出邊五百餘里。會虜騎亦預徙亡所得。其十月。炒花把兔兒欲入廣寧。以兒鄧得兒鄧台吉。青把都欲入錦義。上彥台王哥兒聚黨黃佃子。黑松林。平山。去邊二十餘里。是時精騎十餘萬。揚揚欲馳鎮夷堡。以報夙昔之怨。語在把兔兒傳。居五六年癸巳。炒花益憤。漢殺我兵馬甚多。於是擁二千餘騎。從長勇堡。馬門。沙壩台。入裨將崔吉追逐。斬首虜九級。奪獲馬二十八頭。其五月。詳爲藥弓矢還歸。以示漢不疑。頃之復犯錦義。其十二月。犯清細河。其明年四月。炒花把兔兒上言。

顧脫合赤老撒。上兒愛提萬餘騎。入關東雙台。大小黑山。擊城堡。聲欲略廣寧遼瀋。漢使諜者。謂之諸虜。皆聚馬黑山。迤北錦塔下。頃之。虜以二千餘騎。從莽撞湖。直擣李高麗韓家路。總戎尤繼先。出兵鏖戰。自午至未。斬首虜凡一十八級。奪獲馬八十四頭。被鹵男婦鄭大漢等一百七十一人。牛驢二百二十三頭。陣亡把總李世功。李守仁二人。官軍張國付等四十六人。傷丁尤彪等四十八人。漢馬死者五十三頭。餘黨悉從野豬湖北空台山邊。其七月。炒花把兔兒。卜言顧花大老撒。卜兒艾煖兔。伯言兒哈喇。把拜。阻舊

遼陽。於是犯鎮武。錦義總戎董三元長驅三千餘里。斬首捕虜凡四百餘計。索駝馬牛羊以千數。語在把兔兒傳。其丙申春。炒花以五路哥兒以兒鄧約謀欲引三萬騎寇鈔河東。炒花親速把亥弟始以把兔兒強橫行塞北。既有年。今速把亥把兔兒先後皆伏誅死。而炒花得無恙。炒花一名炒哈。一名抄花。一名抄花。曩者擁兵馳關市下。關吏問何爲。曰吾欲索阿兄速把亥盔甲及什物。庶幾得一事以爲遺念也。花大親速把亥妹夫也。爲泰寧衛酋長。癸酉秋。董忽力常款喜峯口。挾重賞殺人。頃花大伯顏兀亦效之。

而起也。爲患桃林。居一二年。聚會長治兵。聲欲略錦
義。其庚辰秋。克石炭。大小委正。方音。黃台吉。炒戶兒。
以兒。鄧額參。委正。程把都。拱兔。煖兔。裴兔。撻勞。黃花
台吉。逞吉兒。把拜。宰桑。委正。皆止壁半那林。可兒箇。
待土蠻。花大。廼使市夷董吉那阿字。詢得其狀。於是
驅馬馳虜中。而土蠻則已至老河矣。虜中相與謀曰。
從此入新白堡。錦義清細河可乎。頃之。虜騎十餘萬。
並至邊外青山口。大凌河。於是大將軍李成梁備廣
寧以扼清細河。鎮靜關之衝。而又恐虜度我有備。或
走寧前。因窺我開濬。皆不可知。益使遊擊將軍秦得

倚休寧前兵其明年春土蠻及黃台吉克石炭等聚兵略廣寧花大使夷使火力紅道來告其秋復與北虜以兒鄧等一萬餘騎粟馬遼河聲欲略遼瀋是時梁夢龍爲制置使周詠爲臺御史亟使叅將李平胡李得全孫守廉等備遼瀋至備亡何虜以二萬餘騎從榆林堡上永台北空入於是備禦使馬世龍提孫守廉等兵馳大靈虜廼使八百騎挑戰漢兵殊疾力多所殺略虜還歸老營復增兵迎敵而副總戎秦得倚及備禦郎梅兵亦至大相當虜縱兵擊蒲河關廂漢出兵追逐至青堆台漸解散而會李得全王維貞

兵合營。並馳丁家屯。斬首虜六級。奪獲馬十五騎。我軍亡四人。傷五人。漢馬死者一十七騎。虜度不可敵。去。久之。憤。曩時入關。秋毫無所利。於是速把亥炒花老思卜兒愛等。復會煖兔伯言等。略遼陽。廼先使使者窺邊。有如邊吏嚴。弗可犯。卽略廣寧。東西義州。先是。襖兒兔之捷。斬捕甚多。虜乃糾東西虜攻長安堡。副將軍曹簠擊破之。制置使竊必虜騎復再至。以故塞上烽火精明。虜以故不敢入。其明年壬午。速把亥旣伏誅。花大索其屍。馱至營中。伏屍而哭。極哀。於是。以布帛練之。塋於塔母戶渡。哈屯卽以墓屬花大。及。

其子把兔兒守之。語在速把亥傳。其明年春。花大炒。花把兔兒老撒。卜兒愛。卜言顧哄花大。誓衆。聲欲略遼河。其秋果至遼河。頃擊清細河。及關門東西城堡。語在把兔兒傳。其明年秋。把兔兒及老撒。卜兒亥。怨花大中。金夷流矢。聚兵養善木。聲欲略遼瀋海州。其明年春。虜騎六千。馳舊遼陽。其明年。粟馬恰亥。額力素。聲欲從舊遼陽。養善木。入塞。是時西虜欲從無冰者。馳東虜欲從有冰者。馳猶豫久未決。其明年春。花大與西虜以兒鄧等。逐遼河水草。已決。策待秋高馬肥。然後馳廣寧。於是大將軍欲先伐其謀。急使遊擊

將軍韓元功微治丁字泊浮橋出諸虜不意期三月十八日出師既行至打大去邇可一百五十餘里是時制置使李松及備兵使任天祚王緘親臨兵趨諸軍諸軍勇氣益百倍先登擊破之斬拾征孛來乞搭把失等首凡八百二十四級奪獲馬凡五百九十四頭盔甲器械亡算亡降夾羊羔兒兒寨等凡十名傷蒼頭軍徐行謙等凡二百一十六人漢馬死者凡六百三十九頭其夏牧馬遼河頃與大小打刺漢委正黃台吉等聚六萬餘騎略寧遠久之偕西虜以兒鄧捨臣台吉五路男哥哥聲欲略討來兔十方寺已

武功錄

百一十三頭。盔甲器械亡算。其夏粟馬遼河。聲欲略遼瀋。以報疇昔之役。其冬。抄花花大使哈刺那亥字孛戶。叩關稱大小委正等。欲入清細河。錦義以欲有所闢。白故也。其已丑春。抄花把兔兒花大臨邊視道里。大將軍李成梁提兵至卜刺阿兔去邊五百餘里。虜騎先已遁去。亡所獲。其癸巳冬。花大抄花把兔兒等略清細河。其明年春復連卜言額卜兒艾煖兔伯言兒哈喇把拜。二萬餘騎馳舊遼陽。頃之從鎮靜堡迤東。奴台入半邊山。見邊備嚴。花大遂引兵去。漢亦引罷。其後二年。花大使弟孝兒備款塞。請馬市。願

十里矣。我師捕伏山林。而虜以九騎巡山。見我師。盡還走。成梁遣裨將李寧、李興、李有華、吳効忠等擁蒼頭軍五十人。跳驅而前。斬首虜五級。生獲額孫兔一口。是年冬。仰加奴借龍兔以兒鄧及老撒等兵攻虎兒罕。或言寇我開原塞。已那林孛羅等又借兵鈔南關而會阿台。亦欲合兵爲其父王杲報怨。明年春。大將軍成梁復出塞百餘里。襲阿台巢。大破之。斬首捕虜二千三百三十三級。奪獲器械亾筭。語在阿台傳。是時卜言命周。又兆合以兒鄧及老撒等聲欲寇我遼瀋。其夏。把兔兒則連老撒兵。又起欲寇鈔我清細。

河紛紛藉藉。邊外皆報怨之虜。虜騎直走臥牛山。至缸窰。分道而伏。我裨將李平胡。孫守廉。亦捕伏正安堡。三角山。亡何虜竟圍我鎮靜堡。賴馬門。及前臺尖山兵夾攻。而以督臣臨兵。勇氣萬倍。虜始解散。明年夏。虜騎老撒復從把兔兒。聲欲寇我十方寺。而適水深。兵馬不能渡。其秋老撒卜兒艾從抄花等。大鈔我沙嶺。吳家墳。語在灰正傳。其明年春。老撒復從把兔兒等。以市賞要挾我。不則寇我遼瀋。是時土蠻爲政。撒無權矣。語在一克灰正傳。其明年夏。虜騎又寇我沙嶺。高平。大小黑山。於是虜騎歲歲往三岔河。我無

須臾解甲也。甲午夏，炒花把兔兒卜言，願脫合赤卜羅愛等，復約老撒起寇我奴臺。大小黑山居頃之虜騎萬餘，圍綿塔休舍，而青雲臺知虜騎至，鳴砲。於是諸閱視兵馬分道而馳救，虜乃以二千騎走鎮靜堡。莽撞湖直搗李高麗韓家路。是時大將軍尤繼先與備兵使馮時泰定軍令，令逗遛弗前。及下馬爭首級者斬。我師前接戰，至日晏，擊破之，斬首虜一十八級，奪獲被虜男婦一百七十一人，馬八十四匹，牛騾二百二十三頭。漢亦把總二人，卒四十六人，馬五十匹，傷四十八人。其秋，加以花大、緩兔、伯言兒、哈喇

把拜。卜兒艾等率二萬餘騎馳舊遼陽。大言曰。廣寧多金錢。士卒寡。吾擁衆攻之。直旦莫下。居一二日。胡騎自奴臺入。休舍東岳廟。望見邊嚴肅。不戰而還。勞費已甚。而黨亦携矣。

讚曰

老撒卜兒艾終始欲爲速把亥報怨。其志豈不悲哉。卒之把兔兒等相繼授首。而怨竟不可報也。悲夫。我國家大一統。九邊結鄰。而稱臣妾。胡撒何獨倔强。由此觀之。酋固自貽伊戚也。不自艾而怨塞上。塞上何尤。